



Tir Yimiyim



www.tiryimiyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimiyim@gmail.com

TAPAK 8

Yangia anidakangma :

f Tir Yimiyim

ig tiryimiyim@aolima

yt tir yimiyim

TAPAK 7

Bengaluru FC-i coach Simon Grayson mapa nungi anentsü

Gaza nung nütsüing tesa dang yasa-tzüra agi timtemer: UN



VOL. XXI NO. 64 (ADOK 64) DIMAPUR TENTONÜ (MONDAY) LUCHII (DECEMBER) 11, 2023 ₹ 5.00

Lisopur lennir kati Chhattisgarh CM inyaksü 24 buba Hornbill Festival 2023 kanga longsoa tembangogo

Bhopal, December 10, 2023 (Agencies): Chhattisgarh nung Chief Minister inyaksü atema BJP-i lisopur lennir aser taoba Union Minister Vishnu Deo Sai shimogo.

December 13 nü Police Parade Ground nung tezüngzüktep agiba sentong agitsü.

Tanü anüingdang Chhattisgarh nung BJP MLA 54 senden amendang Sai ya BJP legislature party leader asütsü shimtet.

Assembly election results adokba sülen hopta ka shi asadangtepa arur tanü Chhattisgarh Chief Minister inyaksü nübo ka shimogo. Iba ya Prime Minister Narendra Modi-i lisopur ka shimtsüla ta asüba ama lir kechiyong Chhattisgarh nütsüing yongsük nung lisopur 32% lir.

Chhattisgarh nung deputy chief minister ana asütsü aser tenaji state BJP president Arun Sao aser Vijay Sharma na lir

Arun Sao ya Other Backward Classes lennir ka aser külen Vijay Sharma ya Brahmin nunger lennir ka lir.

Chhattisgarh election nung BJP-i lisopur aliba tesemtem nung takok tajung angu aser iba jagi iba lemtet agiogo. Surguja region

nung BJP-i assembly menden 14 prong nung takok angu aser külen Bastar nunga menden 12 nungi 8 nung takok ngua liasü.

Arishi küüm 69 tain Sai ya Rashtriya Swamsevak Sangh (RSS)-i sakloker aser pa ya taoba Chief Minister Raman Singh den tesentaktep tajung aliba nisung ka lir.

Sai-i kümsük pezü tashi MP inyakogo aser 2020 nungi 2022 Chhattisgarh state BJP president inyakogo.

Pa ya BJP National Working Committee nunga züngsem ka liasü aser 2014 küm Narendra Modi sorkar akümba sülen pa junior minister for steel inyaksü shim.

“Chief Minister ka ama ozü sorkar ajanga PM Modi-i nangzükba mapatem inyaksü merangtsü. Sorkar indang mezüing mapaji housing scheme ka nung beneficiaries nem ki lakh 18 agütsüba asütsü” ta Vishnu Deo Sai-i tanü ashi.

Züngsem 90 agi akümba Assembly nung BJP-i menden 54 nung takok angu. 2028 nung Congress-i menden 68 nung takok ngua sorkar aküm saka takümbo parnoki menden 35 nung dang takok nguteta liasü.

Nisung lakh 1.54 temai Kisama semdangogo

Kohima, December 10, 2023 (TYO): Naga Heritage Village Kisama nung 24 buba Hornbill Festival amondang nisung lakh 1.54 tema aruogo.

December 1 nungi Kisama nung tenzüka amongba benjung nung nisung 1,54,057 aden aser iba ya yaküm dang nungi nisung 13,758 agi teimba lir ta Tourism Department, Nagaland-i metetdaksü.

Nisung 1,54,057 rongnung locals 1,14,860, domestic tourists 37,089 aser foreigners 2,108 lir ta parnoki ashi.

Tanü benjung tembangba anogo nung nisung teimtiba arua liasü. Deobarnü Kisama-i nisung

23,583 aru aser tesüiba nung nisung teimtiba arubaji December 3 nü nisung 18,002 aruba liasü, ta Tourism Department-isa ashi.

Yaküm dang nungi taküm domestic tourists tajemba aru, kechiyong yaküm 48,413 aru saka takümbo parnok 37,089 dang aru, ta department-isa ashi.

Ajisüaka foreigners arubabo takümsa teimba liasü. 2022 küm parnok 1,026 aru saka taküm 2,108 aruba ajanga 100% teimba lir.

2022 küm locals 90,860 shilem agi saka taküm 1,14,860 liasü ta Tourism Department-isa metetdaksü.

Kohima Night Carnival takok ngua mongogo

Kohima, December 10, 2023 (TYO): Kohima Night Carnival tembangba anogo nung nisung meyirjang aika adenshia shilem agiogo.

Anogo 10 nü Hornbill Festival amongba nung shilem ka ama Kohima Chamber of Commerce & Industries (KCCI)-i iba carnival ya Y Junction nungi Razhü point tashi ayonga among.

lemzüksü aser anogo ananü tzünglu aruba dak alaka timtem kecha melii dang tembangogo” ta Carnival convenor Keluo-o Solo aser co-convenor Roko Kire nati ashi.

December 1 aonung nungi tenzüka aonungshi nisung aika carnival-i aruogo. Tesüiba dang nungi taküm stall 30 teimba densema lapok aser chiyungtsü den saisapong balala liasü ta tenati ashi.



December 10, 2023 nü Kisama nung United States Consul General, Melinda Pavek, British Deputy High Commissioner, Dr. Andrew Fleming, Tourism & Higher Education Minister Temjen Imna Along, Chief Secretary J. Alam, IAS aser Miss Nagaland 2023 takok angurtemi bonfire tsüklokba angur.

Kohima, December 10, 2023 (DIPR): December 10, 2023 nü Naga Heritage Village, Kisama nung 24 buba Hornbill Festival 2023 tembangogo.

“Hornbill Festival nung densemba atema kanga pelar aser tanü anogo ya universal declaration of human rights sangdong agütsür küm 75 abensaba lir” ta United States Consul General, Melinda Pavek-i alaketa jaoker ka ama shilem agidang ashi.

“Iba document ajanga nübortem ajungmesor aser asenoki iba nung lateta aliba ama liteta aotsü meranger. Naga nunger kin 17 longjemer iba ama benjung amongba ajanga asen sobaliba wazüka ayur aser state balaka kümdaksür. Nisung shia nem human rights agütsüsüba kanga tongtipang” ta Pavek-i ashi.

“Iba benjung nung Native American communities asem nungi teshimtet nübo ana dendaksüba atema kanga pelar. December 6, 2023 nü White House Tribal Nations Summit President Biden-i otsüsütsü Executive Order ka nung sign süogo. Iba ajanga lisopur linüktemi pei sasa ketdangtsütsü tashi tuluba angutsü aser US executive Order ajanga

asem parnok kinungertem züngsema nisung crore 10 tema atur aser iba ajanga election nung temelenshi alitsü ta Steering Committee of the National Joint Council of Action (NJCA) National Coordinator Shivgopal Mishra-ia ashi.

India nung Old Pension scheme tenzüksü rongshir

New Delhi, December 10, 2023 (Agencies): Central aser state sorkar mapa inyakerteri ‘old pension’ atema lungka aita arur aser parnoki Deobarnü Jantar-Mantar, Delhi nung ‘Pension Jaigosh Maharaili’ ayonga agiogo.

Iba sentong ya ‘National Mission for Old Pension Scheme India’ kübok ayongzük aser corporations, boards o autonomous organizations nung inyakerteri shilem agiogo.

“Sorkari 2024 tashi nung old pension meyipa bener arutsüla” ta All India NPS Employees Federation National President Dr. Manjit Patel-i ashi.

“Pension Jayghosh Maharaili” ya lemtet agiba rally ka asütsü ta Dr. Manjit-i ashi.

NPS mapa inyakerteri

lisopurtem pei sasa ketdangtsüba ya temeten ka lir ta akangshir” ta laisa metetdaksü.

“India aser Northeast nung US Tribal Nations nungi teshimtet nübotem adenba benjung tang ya mezüingbuba asütsü saka iba ya tatem masütsü. Asenoki yimjung aser azükaru atema inyaka aodang asenok tesentaktep akangshitsü aser alima tashitaitba küma aotsü” ta Melinda Pavek-isa ashi.

British Deputy High Commissioner, Dr. Andrew Fleming-ia o jembidang pa Hornbill Festival nung arua adenba atema pelaba metetdaksü.

“UK-i Nagaland den sobaliba atema dang masü saka horticulture, healthcare, skills training aser education wadangtem nung külemi inyaksangshia aotsü janrar. Nagaland nung Tourism wadang tulu inyaka aotsü lenmang sadema lir. Nagaland sorkari 24 buba Hornbill Festival kanga takok ngua ayongzükba atema tenüngsang agütsür” ta Dr. Andrew-isa ashi.

Tesüiba anogo 9 tashi asenoki temeyoktep kintem, Government bodies, NGOs, artists aser entrepreneurs-i Nagaland kin shia indang sobalibattem sayuba

ngungo” ta Tourism & Higher Education Minister Temjen Imna Along-i ashi.

Iba benjung ya shisatsü, ajangshiba aser benjung lemsatepba sabang ka lir. Tongti tesemdangertem, alaketa jaokertem aser pelashishia jaoker ajaki shilem agiba ajanga sobaliba benjung telongsoba nung mongogo anungji nenok ajak dang kanga pelar” ta paisa ashi.

Department of Art & Culture-i ayongzükba anogo 10 buba “Cultural Connect” nung Urban & Municipal Affairs Zhaleo Rio-i Host aser Land Resources Advisor G. Ikuto Zhimomi o MLA Y. Mhombemo nati Co-Hosts ama shilem agi.

Nikongdang agiba session nung Panchayat and Rural Development, Food, Public Distribution and Consumer Affairs, Law and Justice, GAD, Government of Assam Minister Ranjeet Kumar Dass-i tongti tesemdang ama shilem agi.

Iba sentong nung New & Renewable Energy and Nagaland State Disaster Management Authority Advisor Z. Nyusietho Nyuthe-i Host aser MLA A. Nyamnyei Konyak o MLA Y. Mankhao Konyak nati Co-Hosts ama shilem agi.

asem parnok kinungertem züngsema nisung crore 10 tema atur aser iba ajanga election nung temelenshi alitsü ta Steering Committee of the National Joint Council of Action (NJCA) National Coordinator Shivgopal Mishra-ia ashi.

Central government employees-i August 10 nü Ramlila Maidan nung mezüingbuba rally ayonga among aser iba sentong nung state aika nungi Employees organizations-i shilem agia liasü.

Iba sülen October 1 nü Ramlila Maidan nungsa ‘Pension Shanknad Maharaili’ ayonga agi aser iba ya National Movement for Old Pension Scheme (NMOPS) kübok ayongzükba liasü.

“Lok Sabha elections matongdang old pension metenzüra BJP-i timtem ajurutsü. Employees, pensioners



Nagaland National Pension System Government Employees Forum (NPPSGSEF) tir Moanungsang Jamir aser züngsem pezü Jantar Mantar nung December 10, 2023 nü Jay Ghosh Maharally nung dena liasü, koba All India National Pension System Employees Federation (AINPSEF) ajanga ayongzük. National Pension System (NPS) agiena Old Pension System (OPS) tanaben amshitsü takhangba Government of India nem agüja iba sentong ya ayongzüka liasü.

Hornbill benjong temaka 'Theheba' stall meshibanger

Dimapur, Luchii/December 10 (TYO): Naga nungeri mapa ajak shia meteta lir aser inyakteter, saka nisung kari dang tatem tonga inyakteter.

24th Hornbill Festival nung sentong tasen aika inoksema jangratema aser meraketa taoba mapang dang nungi kanga agi tajungba mungetogo.

Ajisüaka iba benjong atemba sülen benjong amungba tesem, Naga Heritage Village, Kisama ya azüng-azünga akumer aser taruba benjong matong tashi morung tema anepalu mesüi

yutsür. Benjong mapangbo stall noklang aika amenoka benjong nung adener temi achi-ajemtsü nungi tenzüka kechiserna ajak peria angur. Saka benjong sülenbo iba tesem semdang atema stall makaba ajanga tajemtsü tzü-a mangutsü.

Ajisüaka Naga Heritage Village, Kisama nungya "Theheba" nungja agütsür stall ka küm 20 tejakdang nungi lapoka arur, kong küm tepiyong achi-ajemtsü tabu balala angutsü.

Iba stall ya Kigwema

yimtsüng nungi local entrepreneur Pusi Yakhro-i anepalur, shiba Kisama nung dang alir. Iba stall nung achi-ajemtsü aser danga osettsüset ya benjong mapang aser benjong mapang masüdanga jenjang talang agi agütsür.

Iba stall nung amshiba menden aser langpang ya alder aser süngkum agi yanglua lir.

Angami oshi nung Theheba tetetzü nisung telok adenshia achi-ajemba dang ajar. Iba nungja ya IPR nung taoba Addl. Director, Asür Dominic Yazokie-i jalokja liasü.

LFI boarders tem Khristmas yongya sentong agi



Dimapur, Luchii/December 10 (TYO): Livingstone Foundation International Hostel, Dimapur nung aliba kaketshirtem küm shia amungba Stonite Boarders Advent Christmas and Thanksgiving Day sentong December 9, 2023 nü agia liasü.

Iba sentong ya LFI Auditorium nung Chairman, Dr. Andrew Ahoto Sema aser Director, Ani Yephthomi nati moaja agia liasü.

Hostel nung alirtem aser tesayurtem den tayongzükba o jembidang LFI Chairman Dr. Andrew Ahoto Sema-i ashiba agi, National Education Policy 2020 kübok skill development tsütsü kaketshir nem shisaliok agütsütsü shia aliba ama Co-

Curricular activities densema shisaliok tsütsü maparen tasen inyakba nung LFI ya yakbang süer arur.

Asen tenük agi monguaka Tsüngremi temoatsü balala agütsüba atema asenoki tenüngsang agütsütsü kanga tongipang lir aser item temoatsütem asenoki züngdangtsüla, ta pai ashi.

Pai kaketshirtem dang school nung külem kaketshir, tesayurtem aser tsürabortem densema pei takum ainba nung shilem agir ajunga dang pelatsü ayongzüka liasü.

Chairman aser Director ajanga cake lema iba sentong tenzüik aser iba sülen Grade XII Science nungi Sushikala Jamir-i sarasadema liasü.

Iba sentong nung Bethany Dormitory nungi Christmas Mash-Up ken aten, Rachel Dormitory ajanga Spicy Corn Salad aser Nazareth Dormitory nungi Master Aditya-i tsüngsang ka agi shilem agia liasü.

Maneni Eden Dormitory nungi Grade XI tebur temi telok ken ka aten, Nazareth Dormitory nungi Rachelites ajanga Chapri Band 2 Christmas Edition, Eden Dormitory nungi Grade XII tebur temi telok tsüngsang aser Eden Dormitory ajanga Band Performance ka ajanga shilem agia liasü.

Iba sülen LFI Chaplain, Zhimoholi S. Zhimomi ajanga sentong tembanga sarasadem aser Thanksgiving Dinner agia liasü.

24 Angetyongpang AC nung ABPMJAY CMHIS Card generation training agütsü

Dimapur, Luchii/December 10 (TYO): 24 Angetyongpang Assembly Constituency kübok nüburtem nem healthcare tajungba nung agütsütsü nükjidong nung ABPMJAY CMHIS - Beneficiary Identification System (BIS) atema Card Generation asoshi training ka agüja liasü.

Iba training ya 24 Angetyongpang AC nungi MLA aser Advisor, Water Resources Department, Government of Nagaland, Tongpang Ozukum'er kidang December 9, 2023 nü agia operator trok nem training

agütsü. Iba training ya CMO Mokochung nungi LDA cum BIS operator Takotemjen lenisüba kübok agia Beneficiary Identification System indang inyakyim balala sayua liasü.

Nüburtem nem healthcare services tajungba agütsüba nung aroki shilem agütsü angatetdakja iba training sentong ya Advisor Tongpang Ozukum-i sponsor süa liasü.

Tang tashinung system nung nisung 2,956 tenüng register süogo, koba taoba küm tenzüka sülen takok tulu alitsü.

DIPR ajanga Hornbill Vlog Competition ayongzük



Dimapur, Luchii/December 10 (TYO): Hornbill Festival nung nüburtemi shilem agiba temaba jenjangi ajungkettsü aser social media sapang nung iba benjong ajungkettsü nükjidong nung Department of Information & Public Relations ajanga Hornbill Festival 2023 nung shilem ka ama Vlog Competition ayongzüka liasü.

Iba tetoktepba osang ya Naga Heritage Village, Kisama nung December 10, 2023 nü sangdonga Additional Director, IPR, Kevizayieno-i takoker nem kulizüing kaket den senpet agüja liasü.

Iba Vlog Competition nung mezüngbuba jenjang Atse Quinker-i angu, tanabuba aser tasembuba jenjang ya Chumlano Ngullie aser Soshila nungeri ngua liasü. Iba tetoktepba nung mezüng jenjang nguteter nem senpet sen 10,000, tanabuba jenjang nguteter nem senpet sen 8,000 aser tasembuba jenjang nguteter nem senpet sen 5,000 agüja liasü.

Joint Director, IPR, Asangla Imsong-i iba sentong nung jembidang, mapang tatsütsü

nüburtemi temulung agütsüba putu ka nung vlogs ya kanga tapet lir, kechiaser iba ya ajanga nisung kati pei tajangshiba aser tangatetba lemsatepteter, ta ashi.

Nüburtemi YouTube ama social media sapang balala tali sapua akumdang 'content creators' temi alima nung nüburtem den sendakteptsü asoshi vlogs ya tashi tulu aliba hadir ka kumogo, ta lai ashi.

Otsü ashiba den tenük agi ngua aser nüburtem jangratemsüsa inyakba ajanga nüburtemi tali jangrar, ta ashi.

Iba Vlog Competition ya "Feathers of Hornbill Festival" omen nung ajemdaker anogo ter atema ayongzüka liasü, aser iba mapang shilem agirtemi Hornbill Festival 2023 nung video tatsütsü tangoka lemsatepa liasü.

Internet aser social media putu ka nung Hornbill Festival ya iba Vlog Competition ajanga nisung timbai metettsü aser benjong nung shilem agirtemi ajangshiba metettsü teimla nung Department of Information & Public Relations ajanga iba sentong ya ayongzüka liasü.



Assam Rifles temi anibelem mesasai meranga inyakba ajanga NSCN K (Angmai) nungi self styled captain ka pua liasü. Iba operation ya Assam Rifles aser Nagaland Police lungjemer agia liasü. Pua alisang ya tashiyim amshia senotsü meshiba nung shilem agia liasü.



December 10, 2023 nü Hyderabad nung Telangana Chief Minister, A. Revanth Reddy-i hospital-i oa taoba mapang Chief Minister, K Chandrashekar Rao semdangba mapang tangokba noksa nung angur.

INDIA teloktep senden amentsü: Jairam

New Delhi, Luchii/December 10 (Agencies): Opposition party temi tentetba INDIA teloktep senden pezübuba December 19 nü Delhi nung ayongzüka amentsü, ta Amongnü Congress General Secretary, Jairam Ramesh-i metetdaksü.

Congress Tir, Mallikarjun Kharge-i INDIA teloktep senden December 17 nü ayongzüka liasü saka anogo ana atsülangba kulijibo Ramesh-i memetdaksü.

Mezüngbo iba senden ya December 6 nü ayongzüka, ajiüsü Bihar Chief Minister Nitish Kumar, West Bengal

Chief Minister Mamata Banerjee, Tamil Nadu Chief Minister MK Stalin, Jharkhand Chief Minister Hemant Soren aser Samajwadi Party Tir Akhilesh Yadav nunger iba senden nung medentetsüsa akümba agi senden thinena liasü.

Tawa state kar nung agiba assembly elections nung Congress-i tamakok anguba sülen opposition INDIA teloktep senden amentsü. Iba senden nung sangküm Lok Sabha election atema party tem tsüingda menden lemsatsü aser longjemer lokti senden ayongzüka agitsü densema

tongtibang onük aika benoka o lemteptsü.

INDIA teloktep tesüsabuba senden September ita nung Mumbai nung amenba mapang nung opposition party 27-i coordination committees tenteta liasü.

Sangküm Lok Sabha election nung BJP-i aniba NDA teloktep den tokteptsü atema opposition party temi Indian National Developmental Inclusive Alliance (INDIA) teloktep ya tentet.

INDIA teloktep nung state tenet nungi Chief Minister tem indang party tem densema party 27 lir aser item party nungi tang Lok Sabha nung züngsem 142 lir.

Gogamedi tepsetba ken o nung nisung asem puogo

New Delhi, December 10 (Agencies): Shri Rashtriya Rajput Karni Sena tongti lenir, Sukhdev Singh Gogamedi tepsetba ken o dak sendakba nung Delhi Police Crime Branch aser Rajasthan Police nati senteper nisung asem puogo, ta osang ka ajanga metetdaksü.

Gogamedi tepsetba ken o dak sendakba nung pa dak injang khaloktsür nisung ana densema nisung asem puogo.

December 5 nü Jaipur yimti nung parnoki Gogamedi par kidang khaseta liasü. CCTV noksa ajanga Gogamedi dak

injang khaloktsübaji tangoka liasü.

Jaipur nungi Rohit Rathore aser Haryana kübok Mahendragarh nungi Nitin Fauji na apurtem nem senpet sen lakh 5 agütsütsü, ta sangdonger liasü.

Delhi Police's Crime Branch aser Rajasthan Police nati senteper Rathore aser Fauji naji Chandigarh kübok Sector 22 nung apu. Tena den yaritepsang, Udham Singh-a puogo.

Delhi Police officer kati, tai tonglokja alir asem dang maneni asüingdangyatsü atema Jaipur Police dangi anir aotsü, ta metetdaksü.

Additional Director General of Rajasthan Police (Crime), Dinesh MN-i, Fauji aser Rathore na Chandigarh nung jenshia liasü saka Rajasthan Director General of Police aser Delhi Police nati tentetba Special Investigation Team (SIT) team-i puogo, ta metetdaksü.

Osang angazükba agi, Gogamedi tepsettsü atema asalentong yanglurtem rongnung nisung ka tenüng agi, Ramveer Jat-a densema lir. Gogamedi tepsettsü atema asalentong yangluba nung Jat-i par medemer Fauji den yaritepa liasü.

Chhattisgarh nung tribal lenir Vishnu Deo Sai Chief Minister shim

Raipur, Luchii/December 10 (Agencies): Chhattisgarh assembly election nung BJP-i takok anguba sülen anogo tenetnübuba (Amongnü) nung BJP-i Chhattisgarh Chief Minister shima tenüng angdongogo.

BJP-i Chief Minister menden atema Vishnu Deo Sai shimba ya meimlaba ka lir.

Sai ya BJP nungi state nung tribal lenir ka lir aser pa taoba mapang MP aser Union Minister-a inyakogo. Pa den Deputy Chief Minister anaji Arun Sao aser Vijay Sharma na asütsü.

Taoba mapang Chief Minister, Raman Singh Chhattisgarh assembly nung Speaker shimogo.

BJP-i Sai nem CM menden agütsüba ya sangküm Lok Sabha election agitsü lia state nung Other Backward Classes, tribals aser Adivasi voters anir arutsü atema lir, ta bilemer.

Osangbener den jembidang Sai tetsü, state nung nüburtem tenzüksü atema lar jabaso shimba atema la kanga pelar, ta ashi.

Taoba mapang Chhattisgarh Chief Minister, Bhupesh Baghel-ia Sai nem tenüngsang agütsüogo.

Amongnü BJP observers asem densema BJP legislative party senden amenba mapang nung chief minister menden atema Sai shima liasü.

Sai ya Adivasi nunger lir. 1980 küm nungi Sai-i BJP nung inyaker aser tawa agiba assembly election nung pai Kunkuri constituency nungi takok ngua liasü. Linük nung



Adivasi nütsüng teimba aliba state ji Chhattisgarh lir.

2020 küm Vishnu Dev Sai BJP Pradesh Adhyaksh (State Tir) shima liasü. Pai RSS aser taoba mapang Chief Minister Raman Singh den tesendaktep junga ayuba ajanga pa yimtenren nung jenjang kanga junga aküm.

BJP nungi Raman Singh-i 2003 küm nungi 2018 küm tashi nung kümsük (term) asemnen Chief Minister inyakogo. BJP-i pa maneni chief minister meshimra tangbo OBC mesüra tribal lenir ka chief minister shimtsü tebilemba liasü.

Assembly menden 90 aliba state nung BJP-i menden 54 tashi nung takok ngua liasü aser Congress-i menden 35 nung takok angu.

Chhattisgarh nung election shilem ana lemsar November 7 aser November 17 anogotem nung assembly election agi aser December 3 nü vote zünga liasü.

J&K nung Arrla 370 agienba dak sendakba obendang agütsütsü

New Delhi, December 10 (Agencies): 2019 küm August ita nung Centre sorkari Jammu & Kashmir nung Arrla 370 agienba anema temepishiba ken o benoka liasü; ajioda Hombarnü Supreme Court-i iba ken o dak sendakba obendang agütsütsü.

Chief Justice, D Y Chandrachud leniba nung judge pongui akümba Constitution bench kati September 5 tashi nung anogo 16 tashi iba ken o angadanga aruba sülen tatamsa December 11 nü parnoki obendang agütsütsü.

Iba ken o angadanga aruba mapang nung sorkar tenüng nung Attorney General, R Venkataramani aser Solicitor General, Tushar Mehta nungeri taoba mapang Jammu & Kashmir state nung Arrla 370 agienba pusema kuli aika agüja

liasü.

Ano külen Kapil Sibal aser Gopal Subramaniam na densema senior advocate temi sorkari Arrla 370 agienba anema temepishiba ken o benokertem pusema jembio.

2019 küm August 5 nü Centre sorkari Jammu & Kashmir nung Arrla 370 agien aser Jammu and Kashmir Reorganisation Act of 2019 benoka liasü aser ibaji ajanga Union territories of Jammu & Kashmir aser Ladakh tenteta liasü.

Iba dak alia 2018 küm June 20 nü Jammu & Kashmir nung governor's rule benokba, iba sülen 2018 küm December 19 tashi president's rule atsülangba aser maneni 2019 küm July 3 tashi president's rule atsülangba anema benokba ken otem SC bench-i angadanga aruogo.



December 10, 2023 nü Patna nung 26buba Eastern Zonal Council senden nung Bihar Chief Minister Nitish Kumar-i Union Home Minister, Amit Shah nem nungo ka sempet agütsüdang tangokba noksa nung angur.



TIR YIMYIM YIMOBILEM (EDITORIAL)

DIMAPUR TENTONÜ, DECEMBER (LUCHII) 11, 2023

Benjong temogo

Nagaland state government-i ayongba 2023 kum atema hornbill benjong temogo, anungji tanü nungibo Kohima o Kisama na prongla azungazünger asütsü. Aji oda, yartsüngsangba olaa kenpigabo mangashitsü aser benjong nung tangar nem junger ta sudaktsütsü asoshi ayuba naro aser süngdong lidongtem ajak azülaa oadoktsü. Aji oda, lenmang lenka aser lenrü ajaklen sentsü tapu balala topur junga teploka alibatema sentsü jena oadoktsü aser Kisama yimtok akümtsü. Atangji, Kisama nung hornbill benjongmung amungba tajangzüktem aika rongnung kaji benjong mapang chia-ajemtsü, süoshi aser oset tapu balala yanglua ayokertem aika senotsü jenti ajangzükter asütsü aser ano tanabuba tajangzükji, Nagaland government-i benjong nung adentsü jaokertem, talisa USA, Germany aser Japan nung ama den yimten ajanga nübertem asoshi tesendaktep tajung yanglubaji asütsü. Benjong temaka item tajangzüktemji nübertemi agitettsüsa state government-i sentong tapet tajung maneni yanglua aotsü imlar. Iba denji Kisama aser Kohima dang masü saka Nagaland ajaklen benjong mapang nung dang masü saka mapang ajak nung benjong mapang ama topur junga ayutsübaji government-i mamatsüla aser nübertemia pei alidakbo peisasa bilemteta pei lima aser pei yimti topur junga ayutsüba mapatem inyaksüla. Shitakba Nagaland ya benjong lima, kechiyong kum piyong nung Naga kin shiai mapang balala nung pei pei sobaliba benjongmung amunger aser kum tatem hornbill benjong mung külena ano Khristmas benjong amungtsü aser ano kum tasen benjong amungtsü ta Naga lima ya benjongmung agi sünga lir. Ajisuaka, asenok atema shisabolutsükaji, asenoki benjong amongtsübo mamar saka mapa inyaksü amar, iba jagi benjong amungdang nisung kar ajangzükba dak alaka nisung aika benjongmongtsüa makok timatemer. Ibaji kodang bilemdangdir, Nagaland ya benjong lima dang masü saka nisung ajak mazüngi mapa inyakba lima ka kümdaktsütsüsa government nung alirtemi anir inyaksübaji kanga nüngdak kumogo ta angateter. Hornbill benjong amongba ajanga government-i nisung aika ajangzüdaktsür aser sobaliba asentenshidaktsür, item tajangzüktemji Kisama nung dang masü saka pei pei district aser pei yimtsüng nunga agitettsüsa asenok dak apiteta inyakba shisatsü alitsüla. Sobaliba benjong nungi tenzüker Hornbill benjong tashi ya nisungtemi apiteta yangluba benjongmungtem dang lir. Atangji, benjong ya odang amunger masü benjong shia nükjidong kaka lir. Aji oda, sobaliba benjongbo ajak tsük lu ayimba den sendaktepa lir, anungji alu nung mapa ka temli benjong ka munga anisüngzükli aser Tsüngrem külemla ta sobaliba benjong ya, ano, alu den dang masü saka tamangba yimsü dena sentaktepa lir. Ibaji mesüka Hornbill benjong sobaliba aser senotsü ajangzükba sentongtem dang masü saka tamangba yimsü tsütsüa kum tatem benjong amaka kuma Tsüngrem nem tenüngsang agüja among nunga jungla ta bilemer. Aji oda, Hornbill benjong ya Kisama nung dang masü saka district shia nung amungtsüsa asenok daka sentong tasen apitetba shisatsü alitsüla. Naga nung ajak yim ka nung dang adenshia benjong amungtsübaji, jungjunga bilemdangra, tajangzük dangbo takoksa aser timtemang teimba asütsü. Ibaji asenoki tangar jilu tajung ajizüka meinyaktetba ajanga lir. Ashi, Hornbill benjong ya Nagaland state benjong süra bendang semer nungi adenshirtemjia Kisama aser Kohima na ngur Ungma, Longkhum aser Impur mangu aotsübaji koda? Kasaji, Kisama ngur Longwa aser Saramati mangu atemaji Nagaland mangu amai dang asütsü. Itemji khen jungjunga bilemdanger, tang Hornbill benjong amungba yimya ya melenshitsüla aser Nagaland benjong süra yimtsüng aser town ajak nung ta masüyonga district headquarters ajak nung kasa mapang nung kasa benjong ya amungtsüla. Iba jagi Nagaland tereprangtsü nung dena melenshitsü aser yimtsüng aika raliwalirtem tesep, tourist spot, kümadoktsü. Iba dakji alaka sobaliba benjong tetezü aser topur raksatsüsa 'Mini Hornbill' bo mamungang tajungba asütsü.

OLEMSABANG

LENNIR TAJUNG KATI PEI MAPA ZÜBAZÜBA-A SENZÜKA MEYUTSÜR

~ L. Kika Pongener.

Alipokdang nungi asen mimchir dak aketba tashimait kaji, asenok dak Tsüngrem ama kümnuba shisatsü keta lir. Tsüngremi Eden-tsüki nung mezüng nisung Adam o Eva na yanglur külen, tena Eden-tsüki nung aliba/akaba ajunga reprangtsü, anüktsü, ketdangtsü aser item ajak madak kibur asütsü nungloktsü. Ajisuaka, tena dak pei jenjang/pei tashi dak alia, temaba jenjang nüksüba aser Tsüngrem ama kümnuba shisatsü keta liasü. Per-i tena dak Tsüngrem ama kümnuba shisatsü keta alibaji reprangtet sudi...Per-i Eva-la dang ashi, "Kechiaser koba anogo nung nenoki atsüki tiyong nung aliba sungjangji chidir...Nenok tenük lapoktsü aser 'Tsüngrem ama' tajung tamajung meteta akümtsü" (Lipok-3:5). Aji oda, Adam o Eva-la na dak 'Tsüngrem ama' kümnuba aser pei jenjang dak alia ulua kümnuba shisatsü keta aliba agi, iba tatidang nungji melamela tsüka-adok. Atangji, asen mimchir dak ya pei tashi aser pei jenjang dak alia, ulua kümnuba shisatsü keta aliba agi...Tanüa yimden, arogo, loktiliba ajunga nung lennir aikati, lokti dang nungi pei-ang tuluba, temaba aser taoba...ta asüküma, mezümeküma, ulua bilema lokti tenzükba agi, aiben lokti mapa nung tamakok aludaktsür.

Adam o Eva-la na dak Tsüngrem ama kümnuba...Iba temenen teraji tanü asen putu tashi senmang amangtepa arua...Tanü asenoka pei jenjang aser pei tashi dak alia, ulua kümnuba shisatsüji nisung aika dak keta lir...Ibajagi yimden, arogo aser loktiliba ajak nung lennir aikati pei tenzükba mapa, pei amenba menden, Tsüngremi aser nuburi tenung jateta shimteter mendaktsüba...Iba mendenji akümtsübua tenzüktsü aser meraketa wazüka ayutsü melena, pei ajangzüktsü aser pei jenjang ajungtsüba-jiang ajak dang tongtipangba sudaktsür. Terasatsüka, lennir aikati pei tenzükba aser pei amenba mendenji rongsen aser supokrem yong yoka achir. Ano kanga terasatsüka, lennir aikati lokti renloka tejakleni odaktsütsüba nükjidong tuluba masü, saka rongsen ketdangsuba nung sadem-sadema, teka amuoka amshitsüba aser pei ajangzüktsüba nükjidong nung tang rangloker tenzüker. Tanü lennir aikati kodaser loktiji ajangzüktsü aser renloktsü ???...ta masü, saka kodaser ni tajangzük angutsü ???...ta tang rangloker tenzükba agi asen lima renloka tejakleni maor.

Lennir ajaki kanga junga angatetsübaji, lokti ka nung lennitsü shilem agi atabaji maongka (Previledge) dang masü, saka khuret (Responsible) tulu...ta angateta, nubur-i imlaba ama aser Tsüngrem mulong chidaktsütsüsa, ajemalua tila kümer, nendak-nendaka tenzüktsüla. Ajisuaka, aseni nubur-i aginuba ama aser Tsüngrem mulong achitsüsa medenzükttetra, Tsüngrem aser nübur tsüngdang sentsüh asütsü. Aji oda, aseni kanga tenzüknyongjia term ka ana dang tenzükttetsü akok, saka asen tenzükba mapang nungji asen tenzükba tsüngnep tilakabo alitsüsa tenzüktsüla. Ajisuaka, asen tenzükba mapang tangar asoshi tansutsü/otsüsutsü asütsüsa tenzükttetra, asen chirnur/semchi-semnur asoshi nungmen toktsütsü. Lennir ajaki angatetsübaji...Na aser ni lokti nung ata-a atongokogo, mesüra shilem agi ata-ogo...ta asübaji tongtipangpa masü, saka na aser ni ata-a atongokba mapang, asen nem nungloktsüba mapa, pei tata shilemji aseni akoker asü makoker...??? Mesüra nübur mulong asütsüsa aser Tsüngremi temulong achitsüsa bendanga agüja, tamakok maludaktsüi tenzüker asü metenzüker...??? Ibajiang kanga tongtipangba lir. Terasatsüka, lennir karbo pei ajangzüktsüsa lenmang melira tezü danga, atsü-ayunga inyakba, tangatetba kanga tila lennir karbo alitsü akok.

(Maneni asüng adok nung...)

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

Tripura nung Khristmas anogonung Khristanema anema longkak aittsü

December 10, 2023: Khristmas mapang Tripura nung tensa raksatsüsa RSS den sendaktepa aliba Janajati Dharma Sanskriti Suraksha Manch (JSM) teloki Khristmas anogo nung state yimtiba, Agartala nung longkak aittsü, ta metetdaksüo.

JSM züngsemtemi Khristmas anogo nung tribal Khristanema anema longkak aittsü, talisa Khristan yimsü mesüra Islam yimsü agizüker tribal Khristanema nem sorkar schemes balala nungi teyari magütsütsüla, ta takhangba agüja longkak aittsü.

JSM-i, Khristan mesüra Islam yimsü ya bendanger yimsü, anungji item yimsü agizükertemji Scheduled Tribes (STs) list nungi agienadoktsüla, ta metetdaksü.

JSM-isa, Khristan mesüra Islam yimsü agizükertemji joko tribal sobaliba mebenshir, anungji ST category nungi parnok jendoktsüla, ta ashi.

Osangbenertem senden ka nung jembidang JSM Tripura unit convenor, Santi Bikash Chakma-i, "December 25 nü onoki Swami Vivekananda Ground nung lokti senden tuluka ayongzüksü aser temzüng yanglushia tanga yimsü agizükertem ST list nungi agienang, ta takhangba agütsütsü. JSM-i yimsü kar

anemer masü saka lisopur sobaliba wazüka ayutsü atema inyaker," ta ashi.

JSM-i Khristanema atema kanga tongtibang anogo 'Khristmas' nung longkak aitba ajanga region nung tensa raksatsüa akok ta aikati bilemer.

Agartala diocese nung social communications secretary, Ivan D'Silva-i, "Khristmas anogo nung ang iba ama sentong ayongzükba metetsümonga ayongzükba lir. State nung onoki Arogo denominations ajak senden ka ayongzükba amen aser onoki iba sentong (JSM sentong) anema nokdaksü atema telemtetba agiogo," ta metetdaksü.

Catholic Bishops' Conference of India's Office for Tribal Affairs secretary, Nicholas Barla-ia, "Sangküm general election agitsü lia iba senden ayongzükba ya yimtenren tsütsü asalentong dak sendakba shilem ka asütsüa akok," ta metetdaksü.

Paisa, "Tribal Khristanema ST nungi agientsü atema takhangba agütsüba ya Hindu pusemba party tem election nung tajangzük angutsü atema yimsü nung ajemdaker tribal nüburtem tsüngda telemsa adokdaksütsü nukjidong nung inyaker," ta metetdaksü.

Barla-isa, nüburtem tsüngda telemsa adokdaksütsü atema parnoki yimsü ya hadir ka ama

amshir, ta aittsü.

Tang Tripura nung nütsüng shilem 4.35 shi dang Khristanema lir aser Khristanemji teimbaka Tripuri, Lushai, Kuki, Darlong aser Halam tribal lisopurtem lir.

Taküm küm tetenzüklen Guwahati nunga JSM teloki Assam nung tribal Khristanema nem sorkar welfare schemes nungi teyari kecha magütsütsü takhangba agüja liasü.

India nung Khristan aser Islam yimsü ya bendanglen tentetba yimsü ta züngshir, saka Buddhism, Sikhism aser Jainism bo linük nung tentetba yimsütem ta züngshir.

Lisopurtem ya scheduled tribes, ta züngshir aser Dalits ya scheduled caste lir.

1948 küm latetba ama item lispourtem nem Centre aser state sorkartemji legislative bodies, educational institutions nung menden mekazüktsür aser sorkar rejutem nunga mapa mekazüka yutsür, ajisüaka Khristan aser Islam yimsü agizüker Dalit nungertem nembo item ama tajangzük balala magütsür.

Dalit nunger nem item ama tajangzük magütsüba ama JSM-i ozüng yanglushia Khristan aser Islam yimsü agizüker lisopurtem nem-a sorkar tajangzük balala magütsütsü akhanger.

ANOGO ABEN TSÜNGREM DEN

Tezülen

Mathi 10:17-20

Tanelai Taremzüc Agütsür. Aser kodang parnoki nenok o bendangdaki anidir, aser nenok bendanga agütsüdir, nenoki kechi jembitsü mapang matongdang terata. Saka iba mapang nungji nenok nem kechisa agütsüdir, aji nenoki jembiang; kechiaser tejembibaji nenok masü, saka Tanela Temeshi. Mark 13:11

Iba tekong aikati azünger aser sayutsünger saka ya zülu dang kü mulung nung atangji Yisui ashiba ama tamang asoshi timtem rishikangshi aru nung kwikati aremstsü renema alitsü? ta asüngdanga zülu. Tanela Temeshi-i taremzüc agütsütsü ta kwikati amanger - aremzüker - nangzüker aser aremzüker.

Khrista tenüng nung aremzükbaji sempet ka lir. Tanela Temeshi shibai temenen nungi temulung meyipa anogo nung asen nungdak ajak agütsü, kodang chubatemi, yimsüsürtemi Khrista magizüktsü indang jembidir Tanelai taremzüc sempet peria agütsütsü. Yisui atangji Kibur, shibai tasü madak takok angu. Pai nungdakra tasütsü tsübuba makai kümdaksütsü anungji asenoki metsübui Pa tenüng nangzüktsüla. Iba tenangzükba Par chirtem nem taküm bener arutsüba nok-o-nü aser chubatemi aser yimsüsürtemi anema jembidang Pa nüburtem nem tashi agütsüba lir. Pai agütsüba taremzüc taküm aser Pa taochi ajanga asenoki Pa tenüng nangzükba tatem tashi alitsü.

Kibuba Yisu, Ne Tanela Temeshi ajanga Nai onok nem taremzüc aser tashi agütsütsü nangzükba nung onok mulung sünepjang. Amen.

Dimapur nung Inter-denominational revival crusade tembangogo



December 10, 2023 nikongdang DDSC stadium, Dimapur nung Inter-denominational revival crusade tatembangbuba sentong nung Koinonia Baptist Church Choir-i ken atandang tangokba noksa nung angur.

Dimapur, Luchii/December 10 (TYO): Mongolbar nungi tenzüka anogo troknü tashi DDSC stadium, Dimapur nung Inter-denomination revival crusade agia aruba sülen Amongnü nikongdang tembangogo, ta Information & publicity, Koinonia Baptist Church-i sangdong ka ajanga metetdaksü.

Koinonia Baptist Church, Kohima-i December 5 nungi December 10 tashi DDSC Stadium, Dimapur nung Interdenomination Crusade-tanela asentenshi aser temoatsü crusade ya ayongzükba liasü. "Shishiang aser pelatepang... Aser Kibuba sentsüwangshi

nenok dak alitsü" (Isaia 60:1) omen nung ajemdaker iba crusade agiogo.

Iba crusade nung tongti o jembirtemji: Rev Zotuo Kiewhuo (Kohima Bible College Principal aser Koinonia Baptist Church tentetsang pastor), Samuel Sengupta (Pastor Atmik Jeevan Church), Medotsilieü Kiewhuo (Pastor Koinonia Baptist Church), Rokopra Mekro (Pastor Koinonia Prayer Centre) aser Neibalie Kiewhuo (Pastor Koinonia Baptist Church) nunger liasü.

Amongnü tatembangbuba anogo nung sentong ana agi; anepdang sentong nung

Tsüngrem O jembirji Koinonia Baptist Church nung pastor Medotseilieü Kiewhuo liasü aser nikongdang sentong nung o jembirji Koinonia Baptist Church nung Pastor Rev. Zotuo Kiewhuo liasü.

Anepdang 10:00 ako nungi agiba sentong nung pastor Medotseilieü Kiewhuo-i Isaia 43:18-19 Lai nung ajemdaker, tesüiba mapangtem mebilemtetsüla, kechiyong Tsüngremi asen taküm nung mapa tasen inyaksü, ta ayongzükba liasü.

Laisa, Tsüngremi tai atoker aser asen menen amadoker, ajisüaka satan-i asenok nem asen menen bilemtetdakja

asenok atsüzüksü meranger, ta ashi.

Nisungtemi Tsüngremi ajungba amadoker, ajisüaka Tsüngrem O ajanga Pai asenok dang ajungba mamadoktsü asenok nem nenshia metetdaksür, ta lai ashi.

"Iba crusade ajanga Dimapur asentenshitsü, Dimapur tasen akümtsü aser joko kasa malitsü," ta laisa shisem.

Iba sentong ya Koinonia Baptist Church nung Asst Pastor, Menuosielie Üsou leniba nung agi aser Tenyipe CRC den Ruokuozenuo Meyase-i ken tena liasü.

Kasa sentong nung Chipen

Patton-i 'Kü teyari Kibuba nungi arur' onük nung ajemdaker taküm kuli lemsatep. Pai pa taküm nung tatidang balala koktetba aser Rev. Zotuo lenisüba kübok anogo 21 program nung pai Laishiba züngteta Khrista agizükba lemsatep.

Nikongdang sentong Koinonia Prayer Centre pastor, H. Rokopra Mekro leniba nung agi aser Koinonia Baptist Church Choir, Tolito Shohe (15th IR NAP Mahilla Band) aser Kohima Bible College teloktemi ken ajanga shilem agia liasü.

Iba sentong nung Koinonia Baptist Church tentetsang aser pastor Rev. Zotuo Kiewhuo-i Tsüngrem O jembirji aser Khristan yimsü agizüker Baby Rai-i, 'Yisui dang tesünep agütsütetsü' onük nung ajemdaker taküm kuli lemsatepa liasü.

Iba crusade nung nisung 163 shi counselling agi aser nisung aika shi nung taneptsü anguba aser aika tanela nung temoatsü ngua liasü.

Anogo troknü crusade nung volunteers, counsellors aser officials 468-i yaritep; iba dak alia prayer centres, prayer homes, fellowship aser Arogotem 129 nungi sarasadem nung tamangtir 605-i Shekinah süki nungi crusade agi piyong tanen makai sarasademja liasü.

AO OSHI ANGAZÜKDAK: TANÜ ANGAZÜKTSÜBA OJANG



Sentong

(n) inyaka aotsü lemtetba (plan, program)

* Taküm küm Khristmas sentong kanga junga yanglua lir.

Sentongshir

(n) lokti senden nung sentong anir (compere)

* Sentongshir asütsü tetsür tajungba.

OLONG PAITEP # 6640

Grid for crossword puzzle #6640 with numbered squares.

TIPIEN

- 1. Nisung jenti - (5)
4. Tsük rudenba - (5)
6. Temzüng tesashi - (5)
8. S _ _ _ i - (3)
9. Nisung telemsa - (3)
10. Anogoshi - (4)
12. Ajanga aor - (4)
13. Tsük rizüngdak - (3)
14. Tebang nungi adokba - (3)
16. Süngdong tatembangtiba - (5)
17. Meputep - (5)

LANGTSÜNGLEN

- 1. Tenük telong - (9)
2. Committee dang ajar - (5)
3. Yagi ki okdoker - (7)
5. Yim lenmang - (5)
7. Temoatsü keter meyipa aruba - (9)
11. Kanga junga menemba - (7)
12. Majinü - (5)
13. Tzüma nung senzüba - (5)

OLONG PAITEP # 6639 TELANGZÜBA

TIPIEN :

- 2. Bangsemo, 6. Tiptem, 8. Jen, 9. Talila, 11. Aren, 12. Tzübo, 14. Alia, 16. Angati, 17. Odi, 18. Azü, 19. Sünglang.

LANGTSÜNGLEN :

- 1. Yipten, 3. Nüja, 4. Sangro, 5. Milen, 7. Tulu, 10. Laza, 11. Aben, 12. Tiyong, 13. Ajizük, 14. Aitsü, 15. Tasa, 16. Aina.

NAI-A YA METETTER MA



Manipur nung aliba Loktak Lake ya Northeast India nung freshwater lake tulutiba lir aser tourist temi kanga sapua semdanger. Alima nung floating national park ka dang alibaji iba awatsüng nung lir aser iba dang Keibul Lamjao National Park ta ajar. Iba park nung Manipur state animal sangai (brow-antlered deer) lir. Iba park nungsa aquatic plants tapu 230, ozü tapu 100 aser barking deer, sambar o Indian python amala shiruru tapu 400 shi lir.

Nübertemi Loktak Hydro Electric Project atsülangba magizüker



Imphal, December 10, 2023

(Agencies): Manipur nung Loktak Lake temeket alirtemi Loktak Hydro Electric Project ano küm 25 inyaka aotsüba magizüker.

Deobarnü Bishnupur district kübok Ikhai Wapokpi Public Ground nung "Impact of Loktak Hydro Electric Project in Manipur" ta ser sentong ka agi. Iba sentong ya People's Committee on Restoration of Loktak and its Associated Wetlands Manipur ajanga ayongzük.

Sentong nung adenertemi Manipur nung Loktak Hydro Electric Project extension asütsüba magizüktsü bangjemtep. Iba ya National Hydro Project Corporation (NHPC) Limited-i ketdangüsü repranger.

Iba mapatong ajanga Loktak

Lake nem takoksa jenti bentsür arur aser state sorkari Loktak Protection Act 2006 meyipa repringshitsü ta committee-i metetdaksü.

Loktak Development Authority, Department of Environment and Climate Change aser State Wetland Authority ajanga Loktak Hydro Electric Project mapang atsülangba noktangtsüla ta parnokisa ashi.

Iba sentong nung environmental journalist Rajesh Salam-i Loktak Hydro Electric Project indang osang tejangja lemsatep aser iba ajanga nübertem nem timtem bentsür aruba metetdaksü.

Loktak nung angopurtemi Ithai Barrage nung tzü peria maliba ajanga tayongzükba jenti ajurur. Sorkari tangalen nungi Loktak-i ango bener arua

enoker saka Ithai Barrage nung timtem lir ta Salam-i ashi.

"Loktak Project ajanga Manipur nem tajangzük kecha magütsür. State sorkar aser public-i tebilemsü ola adokaka National Hydro Project Corporation Limited (NHPCL)-i mangashir" ta paisa ashi.

Iba sentong nung Writer Ranjit Ningthouja; Environmental Journalist Rajesh Salam; State Coordinator, Manipur, Indian Bird Conservation Network (IBCN) RK Birjit, aser Retired Principal, Kumbi College K. Jugeshwor nunger aden.

Manipur nung Loktak Hydro Electric Project ya küm 39 tashi inyaka arur. Iba mapatong indang kümsükji küm 35 liasü saka küm pezü atsülanga liasü. Ano NHPCL-i iba mapatong küm 25 atsülangtsü tebilemba lir.

DoNER-i Tripura nem Rs 717 crore lemsüktsür

Agartala, December 9,

(Agencies): Ministry of Development of North Eastern Region (DoNER)-i Tripura nung mapatong 5 atema Rs 717 crore lemsüktsüogo ta Chief Minister Manik Saha-i ashi.

Tripura nung dental college ka atema Rs 202 crore aser Agartala Government Medical College (AGMC) nung mother and

childcare unit ka lapoktsü atema Rs 192 crore lemsüktsüogo.

Maneni Sepahijala district nung drug de-addiction centre ka lapoktsü atema Rs 121 crore lemsüktsü.

"Prime Minister Narendra Modi-i aniba double-engine sorkar kübok Tripura nung nübertem jenjang tajungba akümer. Mapatong 5 inyaksü atema Rs 717 crore

lemzüktsüogo. Tripura nung alirtem yariba atema ni prime minister dang pelaba metetdaksür" ta CM Saha-i ashi.

Centre-i lisopurtem aliba tesemtem nung solar power ulushitsü micro-grids atema Rs 80 crore lemsüktsü. Maneni yimtsüngtem nung gari lenmang asem yanglutsü atema Rs 122 crore agütsütsü mulunga agizükogo.

Meghalaya BJP-i Lok Sabha election nung kija tokteptsü

Shillong, December 10,

(Agencies): Meghalaya nung Bharatiya Janata Party (BJP)-i Lok Sabha elections nung parnok kija ser dang tokteptsü metetdaksüogo.

State pungu nung assembly election results osang adokba sülen Meghalaya BJP-i party tanga den meyaritepi dang

tokteptsü osang sangoktsü.

"BJP central leadership-i Meghalaya nung Lok Sabha menden ana Tura aser Shillong atema candidate shimtsü" ta State BJP spokesperson M Kharkrang-i ashi.

"Nüboyimba maparen timi inyaksü atema candidate shimba nung mapang agitsü. Iba

tebilemba den tanga onükem central leadership den lemsateptsü" ta Kharkrang-isa ashi.

"BJP-i National People's Party (NPP) candidate tem yaritsü akok ta olulu jembibaji tai lir. Taruba Lok Sabha election nung BJP-i kija dang tokteptsü" ta Kharkrang-isa shisem.

ULFA-I-i grenade pokdaksüba atema tenüng agir

Guwahati, December 10,

(Agencies): United Liberation of Asom - Independent (ULFA-I)-i Assam nung maneni amaksü metetdaksüogo.

Parnokisa Assam Director General of Police GP Singh dang tekong merangba anentsü

shiogo.

Tinsukia nung Dirak Army camp aser Sivasagar nung Jaisagar CRPF camp amakba atema ULFA-I-i tenüng agiba metetdaksüogo.

GP Singh-i Assam Police ya par oboula nunger senmang ama mamshitsüla ta ULFA-I-isa ashi.

"Onoki Assam Police den tsükchitepba mesüra tebilemba tamajung kecha mali kechiyong parnok ajak Assam jabsotem lir. GP Singh-i Assam Police ya pa meyong ama mebenshitsüla mesüra onoki maneni grenade amshia amaksü" ta ULFA-I-i sangdong ka nung ashi.

Nütsüng tesadang yasa-tzüra agi timtemer: UN

Gaza City, Luchii/December 10 (Agencies): United Nations nung teyari agütsür ketdangsür kati ashiba agi, Gaza nung rara manenba ajanga yangji nütsüng tesadang ka achi-ajemtsü mali yaseter.

UN World Food Programme nung deputy director Carl Skau-i ashiba agi, Gaza Strip nung nüngdaka aliba chiyongtsü teraka dang iba tesem tongtetogo aser nisung ter nungi nisung toku bo anogoshibo mechiyongteter.

Gaza nung chiyongtsü aser nüngdakba osettsüset magütsüteter, ta Skau-i ashi.

Hamas samatsütsü aser Israel nung pua aliba kidangi anir arutsü mechi Gaza nung tanen makai tayimtsü amshia amaktsü ta Israel-i ashir.

Israel Defence Forces odongtar Lt Col Richard Hecht-i Honibarnü osangbener dang, civilian asüba aser timtemba ajanga temolung shiranger, saka temelen inyaksü kecha mali, ta ashi.

"Gaza Strip telungi aitsü asoshi onoki akokba maparen ajak inyaktar," ta pai ashi.

IDF indang chief of staff Herzi Halevi-i par sepaitem dang, 'Asenoki tali raratsüla, kechiaser kiralongrartemi bendanga agütsür temai adokba asenoki angur... tetetzü parnok tesendaktep laor,' ta shia liasü.

Kasa mapang Biden administration ajanga Congress ajangdangtsü emergency law ka amshi aser Israel dang sen million \$106 dak tema tank indang injang 14,000 shi ayoktsü mela.

October 7 nü Hamas teloki Israel arütsü alema oa nisung 1,200 tepseter ano nisung 240 pua bener aoba sülen Gaza

telungi aitsü mesüra Gaza nungi adoktsü kanga sashia tenokdangba agüja lir.

Israel-i Gaza den arütsü ajunga shibang aser tayimtsü amshia maka Gaza nung alirtemi kanga metaloka aliba 'aid deliveries' nokdangar.

Israel-i tayang kepzüka amakdang Gaza nung tila-tanur 7,000 dak tema densema nisung 17,700 dak tema tepsetogo, ta Hamas meyong health ministry ajanga ashir.

Egypt den arütsülen Rafah crossing kisung lapoka teyari kar Gaza atonger. Anogo ishika tsüngta Israel nungi Gaza-i aiba Kerem Shalom crossing lapoktsü Israel-i tan hopta mulung, saka teyari oset bena aliba gari tem dang meita aor. Iba sülen trucks tem Rafah-i aor aser Gaza telungi aier.

Linük balalai ajungshia taoba ita anogo tenet rara anena ataba mapang Gaza Strip telungi kangasa nüngdaka aliba teyari oset kar bener ai, saka yangji aliba nüburtemi nüngdakba peritsü asoshi tanabuba border crossing lapoktsü nüngdaker, ta WFP ajanga ashir.

Tesem kar nungbo kibong ter nungi toku bo anogo tepiyong achi-ajem mesüi süyidaktsür, ta Skau-i ashi.

Gaza south tsütsü Khan Younis yimti anasülen nungi Israeli tanks temi müketbanger lir.

Anogo ishika Khan Younis nung rangloker tayimtsü amshia kanga sashia amaker aser yangji Nasser hospital nung aliba ketdangsür temi ashiba agi, iba mozükidangi asür aser yirur alirtem anir aruba anepalu mesümar.

Hamas lenirtem Khan Younis nung longpok nung

atsüka alitsü akok ta Israel-i ashir.

Gaza nung tangsa ceasefire alitsü khanga UN Security Council nung pangzüng ka renemba United States-i magizükba sülen Palestine Tir Mahmoud Abbas-i Washington aitsü.

Security Council züngsem 15 aliba nungi linük 13-i iba pangzüng bhukuma vote agütsü. UK-i vote magütsü aser US kisüngi iba pangzüng anema vote agüja liasü.

"Israel sepaitemi Palestine nung tila-tanur, tetsür aser teintet rogotem azüdokshiba ya Washington mapa lir," ta Palestinian Authority lenir Abbas-i ashi.

US ambassador to UN Robert Wood-i iba pangzüng anema vote agütsüba bhukuma iba pangzüng yagi Hamas temi October 7 nü ama maneni mapa tamajung inyaksü tashi agütsür, ta ashi.

Security Council nung US-i mera shidak agiogo, ta Honibarnü Israel Ato Kilonser Benjamin Netanyahu-i pelaba lemsatepa liasü. Anogo tenet rara anena ataba mapang Hamas-i pua aliba nisung 78 chiok aser iba melen Israel nung tepuokdak aliba Palestine nung nisung 180 chioka liasü.

Gaza nung ano nisung 100 dak tema Hamas-i pua lir.

UN Security Council nung iba pangzüng anema US-i vote agütsüba atema linük aser lokti tentet balalai aitsür.

Item rongnung Russian ambassador to UN, Dmitry Polyanskiy-i ashiba agi, "Asen külem tenzüker USA-i asen tenük agi ngua Palestine aser Israel nung alir nisung meyirijang aika nem tasüma temerenshi agütsüogo."

Rohingya nung 200 shi Indonesia nung taolen makai lir

Banda Aceh, Luchii/December 10 (Agencies): Rohingya nung refugee 200 shi Indonesia anüolen tzüküm ka nung taolen makai aliba Deobarnü metetdaktüogo. Refugee ya timba tetsür aser tanurtem lir. Local ketdangsürtemi refugee tasen magizüktsü ta shir aliba mapang ka nung tang iba osang ya angazükogo.

Refugee tem ya rong nung mener anepdang 3:00 ako (2000 GMT Saturday) shi nung iba tzüküm atong. 2015 küm nungi tang tashi nung Myanmar nung rishikangshiba ajanga Rohingya nungertem jenshidar.

2017 küm Myanmar military-i Muslim Rohingya nungertem anema jenjang tesashi agi, koba kin ka samatsütsü merangba ken o ka ama agizüka UN-i bushisüngdangdar.

Rohingya nung million ka shi Bangladesh-i jenaogo aser idak nungjiagi parnok aikati parnok taküm lendongbang nung tokja Malaysia mesüra Indonesia-i aotsü meranga arudar.

"Parnok anenba tesem nung toktsütsü. Tangbo sorkari senotsü kecha mintoktsü," ta Aceh province nung Pidie Social Agency tekolakbai Muslim-i ashi.

Pai ashiba agi, local sorkari refugee tem nem süki aser tanga tenüngdakba osettem agütsütsü asoshi kecha khuret mabentsü.

AFP-isa, tzüküm nung tetsürtem aser tanurtem aika adenshir aliba indang osang metetdaktüogo.

"Pidie nung tejenokdak dak sendakba nung joko iba tesem azünga mali," ta Muslim-i ashi.

Taoba ita Rohingya nung 1000 dak tem aruba sülen local ketdangsürtem aser iba tesem nung alirtemi Rohingya nung magizüker aser parnok tzüym-i meyipa yoktsü amokmerena arudar.

Bodhbarnü Aceh kübok Sabang asetkong nung longkak aiter 150 shi police tem den mangatettep adoka liasü. Parnoki Rohingya refugee tem ya tanga tesem kati anintsü asoshi takhangba agüja liasü.

Tir Joko Widodo-i Hokolbarnü ashiba agi, refugee tem nem khen atema teyari agüja atatsü.

Paisa, Rohingya nungertem aika rong ajanga linük tonga aruba ya nisung shibelenertem dak tai tongloktsüogo aser item nisungtem anema jenjang tesashi agitsü tenangzükba agütsüogogo.

Indonesia ya UN Refugee Convention nung sign asüba linük ka masü aser ashiba agi, Myanmar nungi refugee tem agizüktsü asoshi parnok khuret masü. Ajisüka kidanger linüktemia parnok kishi shibangogo aser ibayongji Refugee tem ya taolen makai kümogo.

China inyakyim Philippines-i aitsü

Manila, Luchii/December 10 (Agencies): Philippine coastguard ketdangsür kati Deobarnü China aitsüogo aser ashiba agi, China-i South China Sea nung parnok indang supply rongtem dak water cannon khaloktsü aser rong ka dak kanga mejungi tsüka engine dena raksatsüogo.

Coast Guard otongdar Jay Tarriela-i, iba rong ana ya Unaizah Mae 1 aser M/L Kalayaan liasü ta ashi.

"M/L Kalayaan rong engine kanga mejungi raksa. China Coast Guard-bo CCG vessel-i UM1 dak atsük ta ashi koba tai lir," ta Tarriela-i X sabang ajanga metetdaktü.

October ita nungi tang tashi nung tang agi tanabenbuba Second Thomas Shoal temeket nung Philippine aser China nung rong tsüktepogo. Second Thomas Shoal ya Philippines indang exclusive economic zone nung lir, kong Philippines nung sepaitem warship tejen ka

nung lidar, koba mangatettep adoker aliba tzüym nung Manila-i parnok tzüym mekazüka ayutsü atema 1999 küm asa amendaka toktsü.

Iba tatalokba dak sendakba nung China nung ketdangsürtemi kecha osang magütsü.

Honibarnüa Philippines-i China nung inyakyim aitsüogo. Honibarnü ya China nung coast guard temi Philippines' fisheries bureau indang civilian sorkar indang rong ka dak water cannon khalokja liasü.


Deobarnü Philippines nung rong 40 shi Christmas convoy ka oya aliba mapang iba lendong ya ataloka liasü.

Atin Ito (This is ours) campaign network-i ayongzükba mission nung ya angopur, lanur lenirtem aser lokti tentet balal nungi züngsem 200 dak temai shilem agia liasü. South China Sea nung Philippines' temeden akhangtsü asoshi iba inyakyim ya civilian temi ayongzükba agia liasü.



People's Republican Party tir aser Egyptian presidential candidate Hazem Omar vote agütsü December 10, 2023 nü Cairo, Egypt nung polling station ka nung oa tangokba noksa nung angur. Egypt nung tir election Deobarnü agitar, kong tang teinyakdak Tir Abd-Fattah al-Sisi densema candidate pezü tokteper.

Tanisha & Ashwini nati tetsür tarep asaya kokogo



Luchii/December 10, 2023 (Agencies): India tetsür tarep asayar Tanisha Crasto aser Ashwini Ponnappa nati Deobarnü Guwahati Masters tetsür tarep asaya final nung Chinese Taipei tsür Sung Shuo Yun aser Yu Chien Hui na koka tanabuba Super 100 title benogo.

India tsür ana ya taoba hopta Lucknow nunga Syed Modi International Super 300 tournament nung runners-up liasü aser Deobarnü final nung tenatia asaya 21-13 21-19 agi koka liasü.

Tenati tang agi asayamung asembuba kokogo. Taküm tenati Abu Dhabi Masters

Super 100 aser Nates International Challenge dena kokogo.

Arishi küm 34 tain Ashwini aser arishi küm 20 tain Tanisha na taküm January ita nungiang külemi asayar aser dena India indang Asian Games squad nunga densema liasü.

BWF (Badminton World Federation) World Tour level trok küma lemsar lir kong World Tour Finals, Super 1000 pezü, Super 750 pezü, Super 500 tenet, Super 300 11 densema lir. Maneni ano asayamung category kaji BWF Tour Super 100 ya lir aser iba asayamung atema-a ranking points agütsür.

Bengaluru FC-i coach Simon Grayson mapa nungi anentsü

Luchii/December 10, 2023 (Agencies): ISL 2023-24 season junga masayateti aruba mapang ka nung Bengaluru FC-i parnok indang coach Simon Grayson aser assistant coach Neil McDonald na den pilaba Honibarnü sangdong ka ajanga metetdaksüo.

Coach Simon Grayson mapa nungi anentsüba sülen teti atema coach ka meshim tashi taoba mapang India nung international asayar Renedy Singh interim head coach ama inyaka atatsü, ta club sangdong ajangsa metetdaksü.

Hokolbarnü kidang Mumbai FC den asayaba mapang asaya goal 4-0 agi makokba sülen coaching staff tem den pilatsü asoshi telemtetba agia liasü.

Grayson-i coach mapa ya 2022-2023 season metenzük dang agizük aser pa lenisüba nung Bengaluru FC pur taoba ISL season aser Super Cup



nung tanabuba jenjang nung tembanga liasü aser iba den Durand Cup-a kokogo.

Ajisüaka Bengaluru FC pur tang asaya aliba ISL season nung jenjang tekububa nung lir. Parnoki asaya teku nung asaya ka dang koka lir aser asaya pezü nung tamakok anguba den asaya pezü draw süa parnok league table bonglanelen lir.

LA Olympics nung boxing asayatsü: IBA

Luchii/December 10, 2023 (Agencies): 2028 küm Los Angeles Olympics nung boxing asayatsü ta ashiba mapang International Boxing Association (IBA) tir Umar Kremlev-i Olympic Games nung boxing masayabosa malitsü, ta ashi.

IBA ya taküm küm tetenzüklen International Olympic Committee (IOC)-i mintokogo. IOC tenteter küm 129buba nung tang mezüngbuba asaya achaayangba lokti tentet ka mintokogo.

Senotsü mashiyimi amshiba aser inyakyim meshidakba dak sendakba nung IBA aser IOC na küm pezü shi mangatettep adoka arur IOC-i iba jenjang ya agiogo.

Ajisüaka IBA Ordinary Congress koba Dubai nung

Honibarnü agia liasü, iba senden nung IBA tir Umar Kremlev-i ashiba agi, boxing asaya ajanga IOC sen aazükler aser boxing masayatsü lemtetra Olympics nung asayatem rongnung nungtugutiba ka masayatsü.

"LA 2028 nung boxing asayatsü. Olympics nung boxing asaya masayara Olympic games-i iba asaya menungratsü asütsü. Iba asayamung nung boxing ya kanga nungtugu asaya ka lir. Boxing asaya ajanga IOC sen aazükler aser onoki sen ya boxer tem yongtsü nung lemshidaksüner," ta Kremlev-i ashi.

Taruba küm Paris Olympics nung boxing asaya ayongzüka asayaba nung IBA-i shilem magitsü aser kasa mapang nung iba asaya ya LA nungbo züngoksema mali.

Taküm küm tetenzüklen Mumbai nung IOC senden ka amenba mapang committee tekolakba Thomas Bach-i ashiba agi, IBA densema boxing asaya kecha masayatsü.

Maneni IBA secretary general Chris Roberts-ia, boxing dang sendakba nung kecha shisabulua bilemba mali ta shiogo.

"Olympics nung boxing maneni asayatsü aser kecha shisabulutsü mali. Onok atemabo iba ya teti ama inyakyim ka dang lir aser kechi inyaka aru yamaji dang inyakyonga aotsü," ta Roberts-i ashi.

IOC aser IBA na mangatettep adokba ajanga iba asaya Olympics nung maneni asayatsü asoshi World Boxing ta nungja agütsür lokti tentet tasen ka tenzükogo.

AR aser DBS na tsüngda basketball asaya



Dimapur, Luchii/December 10 (TYO): Assam Rifles aser Don Bosco School kaketshirtem December 10 nü Don Bosco School, Bhandari nung friendly basketball asaya ka ayongzüka asayaogo.

Iba asaya ya asayar tanüla ajungkettsü aser kaketshirtem o Armed force na tsüngda tesendaktep akangshitsü nükjidong nung Assam Rifles

den longjemer school-i ayongzüka asayaogo.

Kaketshirtem aser AR sepaitem ajaki iba asaya nung kanga jangrabangra asayaogo. Iba asaya kanga takok ngua asayaogo, kong kaketshirtem aser sepaitem ajaki parnok sempet tajungtiba sayua jangrabangra asayaogo.

Assam Rifles aser Don Bosco School na longjemer iba

asaya ayongzüka asayaba ajanga asaya tanüla ajungketba dang masü saka iba ajanga sepaitem aser kaketshirtem longjemer sensaksemstsü asoshi maongka tajung agütsüo. Iba amala sentong tajung ayongzüka agiba ajanga lokti nung telen balala tsüngdang apu latsür aser telungjem adokdaksüba den kati ka tali akümtsübutepa akümer.

Phek dist. Belt & Free Style Wrestling camp agiogo

Pfutsero, Luchii/December 10 (TYO): Chakhesang Wrestling Association (CWA) tawabangba kübok Phek District atema Honibarnü Dr. SC Jamir Badminton Stadium, Pfutsero nung Belt & Free Style Wrestling atema selection trial camp agiogo.

CWA General Secretary Kuzhovesa Soho-i sangdong ka ajanga ashiba agi, taruba Nagaland Olympic Games 2024, koba February 12 nungi 17 tashi agitsü lir, iba asayamung nung shilem agitsü atema asayatem shimtsü asoshi iba camp ya ayongzüka agiogo.

Ajak senteper iba camp nung Phek District nungi wrestler 30-i shilem agi aser category ajak nungi tajungtiba ana shimogo aser item asayatem ya Phek District tenüng nungi Nagaland Olympic

Games nung asayatsü. Camp ketdangsurtem rongnung Vekhriyi Chüzho, Surhoney Soho aser Mhasheve Resuh densema liasü.

Camp nung shilem asayatem yamai alitsü:

BELT WRESTLING (MEN)

- 1. 60 Kg and below**
1st- Rüpfüzo Lase
2nd- Ngosa Tünyi
- 2. 70 Kg and below**
1st- Yonuyi Yhobu
2nd- Wecho Wetsah
- 3. 80 Kg and below**
1st- Vethozo Lohe
2nd- Pozo Kezo
- 4. 90 Kg and below**

- 1st- Preku Krome
- 2nd- Kuluveyi Puro

5. 100 Kg and below

- 1st- Serayi Tetseo
- 2nd- Thuputha Hesuh

BELT WRESTLING (WOMEN)

- 1. 60 Kg and below**

FREE STYLE WRESTLING (MEN)

- 70 Kg and below**
1st- Kusayi

FREE STYLE WRESTLING (WOMEN)

- 60 Kg and below
- 1st- Vekhonelu Curhah

BILEMDANGANG
Pei jangrabana mapa inyakra teti jangrabangba inyaktsü."